



Kommunane i Vestland

Saksbehandlar, innvalstelefon

Håvard Rød, 5557 2143

STATSBUDSJETT 2022 - KOMMUNEOPPLEGGET - TILLEGG

Solberg-regjeringa presenterte 12. oktober framlegg til statsbudsjett for 2022. Vi viser til vårt brev frå same dagen om kommuneopplegget. Den nye regjeringa (Støre-regjeringa) har no presentert framlegg til endringar i statsbudsjettet for 2022. Vi vil i dette brevet gi eit samandrag av endringane knytt til kommuneopplegget.

Det er framlegg om å auke dei frie inntektene med kr 2,5 mrd. for heile kommunesektoren, samanlikna med det opphavlege budsjettframlegget. Av dette går kr 2,0 mrd. til primærkommunane. Denne veksten kjem i tillegg til veksten i dei frie inntektene som var lagt til grunn i det opphavlege budsjettframlegget, kr 1,6 mrd. i realvekst for primærkommunane. Auken i dei frie inntektene kjem på innbyggjartilskotet i rammetilskotet. Samla påreknna realvekst i frie inntekter for primærkommunane i 2022, samanlikna med inntektsnivået i revidert nasjonalbudsjett i 2021, er med dette kr 3,6 mrd.

Tilskot per grunnskule

Regjeringa kjem med framlegg om eit tilskot på kr 500.000,- per kommunal grunnskule. Tilskotet blir gitt med ei særskilt fordeling basert på tal for skuleåret 2021/2022. Tilskotet blir finansiert innafor den nemnde veksten i innbyggjartilskotet til kommunane.

Ressurskrevjande tenester

I det opphavlege budsjettframlegget var det lagt opp til å auke innslagsnivået for tilskot ressurskrevjande tenester, frå kr 1,430 mill. til kr 1,520 mill. for netto utgifter i 2021. Dette svarte til ein auke på kr 50.000,- per tenestemottakar utover justering for påreknna lønsvekst i 2021 (2,8 prosent).

Den nye regjeringa gjer framlegg om å reversere den sistnemnde auken i innslagsnivå på kr 50.000,-. Det utgjer kr 300 mill. for kommunane samla i auka tilskot samanlikna med det opphavlege framlegget. Innslagsnivået for å få kompensasjon blir med dette kr 1,470 mill. per tenestemottakar for netto utgifter i 2021.



Utvida ramme for startlån - formidlingslån kommunane

Det er framlegg om at Husbanken får kr 2,0 mrd. meir til startlån for nye bustadkjøparar. Regjeringa sitt framlegg inneber at Husbanken si låneramme blir auka til kr 21,0 mrd. Føremålet er at fleire kan gå frå å leige til å eige eigen bustad.

Barnevernreform

Barnevernreforma trer i kraft frå 1. januar 2022, og kommunane får som ein del av reforma auka finansieringsansvar. Kommunane skal bli kompenserte gjennom auke i rammetilskotet, om lag kr 1,31 mrd. i 2022.

Kompensasjonen over rammetilskotet vil over tid bli fordelt etter kostnadsnøkkelen for barnevern. For å dempe overgangen for kommunar som har høge utgifter, vart det i opphavleg budsjettframlegg lagt opp til at halvparten av kompensasjonen blir fordelt særskilt i 2022 og 2023, basert på faktisk bruk av tiltak i 2020. Den andre halvdelan blir fordelt etter delkostnadsnøkkelen for barnevern.

Regjeringa vil forlenge denne overgangsperioden for kompensasjon med eit år, slik at halvparten av kompensasjonen for barnevernreforma blir gitt som særskilt fordeling til og med 2024.

Det er oppdaga nokon feil i grunnlagsdata for den særskilte fordelinga av kompensasjon til kommunane i samband med reforma. Dette vil bli retta opp, og ei korrigert særskilt fordeling av halvdelan av kompensasjonen til kommunane vil bli lagt til grunn for utbetaling av tilskot i 2022.

Redusert maksimalpris i barnehage

Regjeringa gjer framlegg om at maksimalprisen i barnehage blir kr 3.050,- per måned frå 1. august 2022. Prisen blir med dette redusert med kr 265,- per måned samanlikna med framlegget om maksimalpris frå 1. januar i det opphavlege framlegget til statsbudsjett.

Det blir lagt opp til at kommunane blir kompenserte for dette gjennom auke i rammetilskotet på kr 314,9 mill. i 2022.

Tilskot til pensjon i private barnehagar

I det opphavlege budsjettframlegget var det lagt til grunn reduksjon av tilskotet til pensjon i private barnehagar frå 13 prosent til 11 prosent frå 1. januar 2022.

Regjeringa gjer framlegg om å justere ned pensjonstilskotet til private barnehagar til 10 prosent av lønsutgiftene i kommunale barnehagar med verknad frå 1. januar 2022.

Det er framlegg om ei overgangsordning for einskilde barnehagar på 3 år (2022-2024) slik at barnehagar med mindre økonomisk handlingsrom får noko betre tid til å tilpasse seg inntektsbortfallet. Pensjonspåslaget blir for desse barnehagane 12 prosent i 2022, 11 prosent i 2023 og 10 prosent i 2024.

Ekstra time naturfag

I det opphavlege framlegget til statsbudsjett var det planlagt innføring av ein ekstra time naturfag i grunnskulen frå skuleåret 2022/23, med kompensasjon over rammetilskotet med kr 99,8 mill.

Regjeringa gjer ikkje framlegg om denne utvidinga av timetalet i naturfag. Det blir difor heller ikkje gitt kompensasjon for dette over rammetilskotet.



Framlegget om å ikkje utvide timetalet i naturfag har samanheng med ei målsetjing om å styrke den praktiske læringa i skulen med sikte på m.a. yrkesfagleg opplæring.

Endringar i skatte- og avgiftsopplegget

Det er pårekna at primærkommunane vil få auka skatteinntekter i 2022 med om lag kr 2,5 mrd. som følgje av endringar i skatteopplegget for inntekt og formue. Det er framlegg om ein tilsvarande reduksjon i rammetilskotet for kommunane samla.

Prosentvis vekst i frie inntekter

I det opphavlege budsjettframlegget var det ein pårekna nominell vekst i frie inntekter for kommunane samla i Vestland på 1,4 prosent. Auken er frå pårekna inntekter i 2021, medrekna oppjusteringa av skatteinntektene i år.

Denne veksten er i det nye framlegget rekna til 2,1 prosent for kommunane samla i Vestland.

Med helsing

Nils Erling Yndesdal
kommunaldirektør

Håvard Rød
seniorrådgivar

Vedlegg

Dersom det er spørsmål til innhaldet i brevet, kan kommunane ta kontakt med Håvard Rød (55572143), Marit Lunde (57643005) eller Kåre Træen (57643004) hjå Statsforvaltaren.

Dokumentet er elektronisk godkjent